

Inatsisartut 2010-mi ilassutitut aningaasaliissutininut inatsisissaattut siunnersuut
(Aningaasaqarnermut Naalakkersuisoq)**Saqqummiussissut**
Siullermeerneqarnera**Saqqummiussissut**

Matumuuna Naalakkersuisut sinnerlugit Inatsisartut 2010-mi ilassutitut aningaasaliissutininut inatsisissaattut siunnersuut saqqummiuppara. Missingersuusiortarnej pillugu inatsimmi § 26-mi aalajangersakkani allassimavoq ukiup aningaasaliiffiusup ingerlanerani aningaasaliissutit oqaasertaliussallu nutaat allanngortitaluunniit ilassutitut aningaasaliissutininut inatsimmut ukiumi tulluuttumi saqqummiunneqartussami ilanngunneqartassasut.

Taamaalilluni Inatsisartut 2010-mi ilassutitut aningaasaliissutininut inatsisissaattut siunnersuut aningaasaleeqqinnermut inatsisitut isigineqartariaqarpoq. Ilassutitut aningaasaliissutininut inatsisikkut Naalakkersuisut aningaasanut inatsimmut oqaasertaliussani piginnaatitsissutit Inatsisartullu Aningaasaqarnermut Ataatsimiititaliaata ukiumi aningaasaliiffiusumi 2010-mi aalajangeriigaat, tungavigalugit aalajangiisimaneramik pissusissaatut inissiisoqarpoq.

Inatsisartut 2010-mi ilassutitut aningaasaliissutininut inatsisissaattut siunnersuutip imarai ilanngussaq 1 aningaasaliissutit allannguutaannik 2010-mi akuersissutigineqartunik takutitsisoq aamma ilanngussaq 2 taamatutaaq 2010-mi oqaasertaliussat allannguutaannik akuersissutigineqartunik takutitsisoq.

2010-mut Aningaasanut Inatsit aamma Inatsisartut 2010-mi ilassutitut aningaasaliissutininut inatsisissaattut siunnersuut ukiumi aningaasaliiviusumi 2010-mi aningaasaliissutininut tamarmiusunut takussutissaapput. Taamaalillutik Nunap Karsiata 2010-mi naatsorsuutaanut Inatsisartut ataatsimiinnermi matumani kingusinnerusukkut suliarisassaannut aallaaviupput.

Inatsisartut 2010-mut aningaasanut inatsisaat missingersuutini IST-mi 227 mio. koruuninik amigartooruteqarnissamik takutitsivoq. Inatsisartut Aningaasaqarnermut Ataatsimiititaliaata 2010-p ingerlanerani ilassutitut aningaasaliissutissat missingersuutini IST-mi amigartoorutissanik 35,6 mio. koruuninik amerlisitsisut akuersissutigereerpai. Taamaalilluni Inatsisartut 2010-mi ilassutitut aningaasaliissutininut inatsisissaattut siunnersuutip kingunerissavaa ukiumi aningaasaliiffiusumi 2010-mi missingersuutini IST-mi 262,6 mio. koruuninik amigartooruteqartoqarnera.

Taamatut oqaaseqarlunga Naalakkersuisut Inatsisartut 2010-mut ilassutitut aningaasaliissutininut inatsisissatut siunnersuutaat Inatsisartununut suliaannngortippara.